

## معلومات حول وضع اللجوء للأشخاص من سوريا في النمسا بعد انتهاء نظام الأسد (اعتبارًا من 16.12.2024)

1. شو يعني الوضع الجديد بسوريا لطلبات اللجوء يلي قيد المعالجة ؟  
إدارة الأجانب واللجوء (BFA) قررت حالياً ما تأخذ قرارات بملفات اللجوء للسوريين (Bescheide) يعني:
- طلبات اللجوء رح تظل معلقه وما رح يتم اتخاذ قرارات حالياً.
  - BFA بدها تقارير جديدة عن الوضع بسوريا لتقدر تقرر، ولازم تنتظر لتشوف كيف بيتطور الوضع.
  - بس بعد ما توصل التقارير الجديدة، ممكن يتخذوا قرار بخصوص طلب اللجوء.
  - ما حدا بيعرف قديش رح تأخذ ليرجعوا يقرروا بسبب الوضع الغير واضح بسوريا.
- إذا كان في استئناف على قرار سلبي، المحكمة الإدارية بتقرر كل حالة لحالها، والقاضي أو القاضية بيحددوا إيمتا ممكن ياخذوا القرار. والمحكمة كمان ممكن بتحتاج تقارير جديدة.  
الحكومة النمساوية قالت إنه حتى بملفات لم الشمل ما في قرارات حالياً.

2. ممكن تنسحب اقامة اللجوء بسبب تغيير الوضع بسوريا؟  
اللجوء معناه حماية من الملاحقة الشخصية ببلدك طالما هاد الاضطهاد موجود. إذا سبب الاضطهاد اختفى، ممكن تنسحب اللجوء. إذا كان ممكن يسحبوا اللجوء هاد بيعتمد بالاساس على السبب الشخصي ليش أخذت اللجوء وإذا هاد السبب اختفى. يعني:
- BFA ما فيها تقرر مرة وحدة لكل الناس وإنما لازم تراجع كل حالة بشكل قانوني منفصل.
  - اللجوء ما فيهن يسحبوه فجأة. قواعد سحب اللجوء هي تقريبا نفس قواعد وإجراءات اللجوء.
  - BFA لازم تعمل مقابلة أو تطلب بيان خطي ولازم تراجع بشكل دقيق إذا الملاحقة بكل حالة فردية اختفت فعلاً.
  - BFA كمان لازم تشوف إذا الوضع الجديد بسوريا خلق أسباب جديدة للاضطهاد الشخصي.

3. شو بصير إذا BFA سحبت صفة اللجوء؟  
مثل إجراءات اللجوء، BFA لازم تصدر قرار رسمي إذا سحبت صفة اللجوء.
- فيك تعترض على القرار. ولحد ما المحكمة الإدارية (BVWG) تأخذ قرارها، رح تضل صفة اللجوء معك.
  - سحب اللجوء ما بيعني إنك رح تترحل مباشرة على سوريا. BFA لازم تشوف الوضع الأمني والمعيشي بمنطقتك الأصلية، وإذا في أسباب تمنحك حق الحماية (هويه الرماديه).
  - BFA كمان لازم تراجع إذا قرار الرجوع (= مغادرة النمسا) بيأثر على حقوق الإنسان بالحياة العائلية والشخصية. هاد بيعتمد على الاندماج، مدة الإقامة بالنمسا، وغيره.

يعني ممكن يسحبوا اللجوء إذا السبب القديم اختفى وما في سبب جديد، بس بدل اللجوء ممكن يعطوك حماية أو إقامة. (Rot-Weiß-Rot-Karte)

4. ممكن يسحبوا اللجوء من الأشخاص اللي صار لهم زمان بالنمسا؟  
اللي عنده لجوء بالنمسا أكثر من 5 سنين، وعاش بالنمسا، وما انحكم عليه بأي جريمة من محكمة نمساوية، ما يقدرُوا  
يرحلوه على سوريا.  
ممكن يسحبوا اللجوء، بس بدل عنه لازم يعطوه إقامة دائمة بالاتحاد الأوروبي (= إقامة أوروبية).

5. ممكن ينسحب الحماية بسبب تغير الوضع بسوريا؟  
الحماية بتتمنح مو بسبب الملاحقة الشخصية (الأسباب سياسية)، بل عادةً بسبب سوء الوضع الأمني والمعيشي.  
• BFA لازم تنتظر وتشوف كيف بيتطور الوضع الأمني والمعيشي بسوريا بشكل عام وبكل منطقة  
على حدة.  
• إذا التقارير الجديدة عن سوريا بتبين إنه الوضع تحسن بشكل كبير ولمدة طويلة، فممكن من حيث  
المبدأ يسحبوا حق الحماية.  
• وكمان بهالحالة، في إجراءات قانونية مع مقابلة وقرار رسمي واعتراض للمحكمة الإدارية  
(BVWG)، ولازم يدرسوا الاندماج بهالإجراءات.  
انتبه: لازم تضل تجدد الحماية بوقتها! . ممكن يكون ال BFA ما عم يقرر حالياً بخصوص طلبات تمديد الحماية. لحد ما  
يقروا، الحماية تضل سارية!

6. شو المهم هلق؟  
• إذا بلشوا بإجراءات السحب ، BFA رح تبعت رسالة لعنوانك المسجل. لذلك من المهم كثير ما يكون  
في مشاكل بتلقي البريد، وتفحص البريد بانتظام. إذا ماستلمت البريد بالوقت الصح محتمل تروح عليك  
فتره الاعتراض.  
• إذا بلشوا بإجراءات السحب، من الضروري تستشير منظمات غير حكومية (NGOs)، BBU أو  
محامي لحتى تناقش حالتك بشكل فردي.

ملاحظة: المعلومات المقدمة هون بس للعلم وما تعتبر استشارة قانونية. ما لازم تعتمد عليها بدل استشارة قانونية من مختص. وكمان المعلومات  
مبسطة ومختصرة شوي لحتى يسهل فهم المواضيع المعقدة. ما في ضمان إنو المعلومات كاملة أو 100% صحيحة.